

interea nigras pecudes promittite Diti
et nivei lactis pocula mixta mero.

Liber tertius, 6

Candide Liber, ades – sic sit tibi mystica vitis
semper, sic hedera tempora vincta feras –
aufer et ipse meum patera medicante dolorem:
saepe tuo cecidit munere victus amor.
care puer, madeant generoso pocula baccho,
et nobis prona funde Falerna manu.
ite procul, durum curae genus, ite labores:
fulserit hic niveis Delius alitibus.
vos modo proposito dulces faveatis amici,
neve neget quisquam me duce se comitem:
aut si quis vini certamen mite recusat,
fallat eum tecto cara puella dolo.
ille facit mites animos deus, ille ferocem
contudit et dominae misit in arbitrium,
Armenias tigres et fulvas ille leaenas
vicit et indomitis mollia corda dedit.
haec Amor et maiora valet. sed poscite Bacchi
munera: quem vestrum pocula sicca iuvant?
convenit ex aequo nec torvus Liber in illis,
qui se quique una vina iocosa colunt:
convenit iratus nimium nimiumque severos:
qui timet irati numina magna, bibat.
quales his poenas qualis quantusque minetur,
Cadmeae matris praeda cruenta docet.
sed procul a nobis hic sit timor, illaque, si qua est,
quid valeat laesi sentiat ira dei.
quid precor a, demens? venti temeraria vota,
aeriae et nubes diripienda ferant.